



PREDSTAVNIČKI / ZASTUPNIČKI DOM
KLUB POSLANIKA
STRANKE DEMOKRATSKE AKCIJE

ПРЕДСТАВНИЧКИ ДОМ
КЛУБ ПОСЛАНИКА
СТРАНКЕ ДЕМОКРАТСКЕ АКЦИЈЕ

Sarajevo, 22.02.2024. godine

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO: 22-02-2024			
Organizaciona jedinica	Klasifikaciona oznaka	Redni broj	Broj priloga
01-	02-1-	438	24

12/154

PREDSTAVNIČKI DOM PARLAMENTARNE SKUPŠTINE
BOSNE I HERCEGOVINE

n/r predsjedavajućeg g. Marinko Čavara

Predmet: Prijedlog Zakona o sprečavanju sukoba interesa u institucijama Bosne i Hercegovine sa zahtjevom za razmatranje istog po hitnom postupku, a u skladu s članom 133. Poslovnika Predstavničkog doma Parlamentarne skupštine Bosne i Hercegovine, dostavlja se,-

Na osnovu člana 104., člana 105. i člana 133 Poslovnika Predstavničkog doma Parlamentarne skupštine Bosne i Hercegovine (Službeni glasnik BiH, br 79/14, 81/15, 97/15, 78/19, 26/20, 53/22 i 59/23) kao ovlašteni predlagач podnosim:

-Prijedlog Zakona o sprečavanju sukoba interesa u institucijama Bosne i Hercegovine;

Uz Prijedlog Zakona dostavljam obrazloženje.

U skladu s članom 133. Poslovnika Predstavničkog doma Parlamentarne skupštine, tražim da se navedeni Prijedloga zakona **razmatra po hitnom postupku**, imajući u vidu da je donošenje predloženog Zakona jedan od prioriteta za otvaranje pregovora BiH za članstvo u EU. Zbog navedenog i imajući u vidu rokove do zasjedanja Evropskog vijeća u martu 2024. godine, kada se razmatra Izvještaj Evropske komisije o napretku Bosne i Hercegovine u ispunjavanju kriterija, donošenje Zakona o sprečavanju sukoba interesa u institucijama Bosne i Hercegovine ima visok stepen hitnosti.

Zastupnik

Šerif Špago

Na osnovu člana IV 4,a) Ustava Bosne i Hercegovine, Parlamentarna skupština Bosne i Hercegovine je na _____ . sjednici Predstavničkog doma, održanoj ____ . _ .2024 godine i na ____ . sjednici Doma naroda, održanoj ____ . _ .2024 godine, donijela

ZAKON
O SPREČAVANJU SUKOBIA INTERESA U INSTITUCIJAMA
BOSNE I HERCEGOVINE

POGLAVLJE I. Opšte odredbe

Član 1.

(Predmet)

- (1) Zakonom o sprečavanju sukoba interesa (u daljem tekstu: Zakon) uređuju se: posebne obaveze nosilaca javnih funkcija na nivou Bosne i Hercegovine s ciljem sprečavanja sukoba interesa u obavljanju javne funkcije, obaveza podnošenja i sadržaj izvještaja o finansijskom stanju i imovini nosilaca javne funkcije, nadležnost za provođenje Zakona, osnivanje i postupak Komisije za odlučivanje o sukobu interesa (u daljnjem tekstu: Komisija) u provođenju Zakona, kao i druga pitanja od značaja za provođenje ovog zakona.
- (2) Sukob interesa postoji u situacijama u kojima nosioci javnih funkcija imaju privatni interes koji utiče ili može uticati na zakonitost, otvorenost, objektivnost i nepristrasnost u obavljanju javne funkcije.

Član 2.

(Upotreba muškog ili ženskog roda)

Izrazi koji su, radi preglednosti, dati u jednom gramatičkom roku, bez diskriminacije se odnose i na muškarce i na žene.

Član 3.

(Definicije)

U smislu ovog zakona:

- a) „**nosilac javne funkcije**“⁴⁴ je izabrano ili imenovano lice u instituciji Bosne i Hercegovine, organu, agenciji i ustanovi koje osniva Bosna i Hercegovina, korporaciji ili drugom pravnom licu koje vrši javna ovlaštenja, odnosno djelatnosti od javnog interesa, kao i lice na čiji izbor ili imenovanje saglasnost daje ministarstvo u Vijeću ministara BiH, Vijeće ministara BiH, Predsjedništvo BiH i Parlamentarna skupština BiH, ukoliko drugim zakonom nije drugačije određeno;
- b) „**ovlašteno lice**“⁴⁴ je lice koje je osnivačkim aktom ili drugim aktima preduzeća ovlašteno da predstavlja i zastupa preduzeće, kao i poduzetnik, odnosno fizičko lice koje samostalno na tržištu obavlja djelatnosti radi sticanja dobiti;
- c) „**bliski srodnik**“⁴⁴ je bračni drug, vanbračni drug, dijete, majka, otac, usvojitelj i usvojenik nosioca javne funkcije;

- d) „**povezano lice**“ je bliski srodnik, srodnik u pravoj liniji, srodnik u pobočnoj liniji do trećeg stepena, srodnik po tazbini do drugog stepena, dijete bračnog druga, ili bilo koje pravno ili fizičko lice koje je sa nosiocem javne funkcije u ličnoj, političkoj, ekonomskoj ili drugoj vezi koja bi mogla uticati na objektivnost u radu nosioca javne funkcije;
- e) „**ulaganje kapitala**“⁴¹ je ulaganje novca, stvari i prava u vlasničku strukturu preduzeća;
- f) „**finansijski interes**“⁴¹ je:
1. svaki interes kojim se nosiocu javne funkcije omogućava da primi novac u vrijednosti većoj od 1.000 KM godišnje;
 2. svaki vlasnički interes koji ima nosilac javne funkcije, koji odgovara vrijednosti od najmanje 10.000 KM u preduzeću, društvu sa neograničenom odgovornošću, komanditnom društvu, dioničarskom društvu ili društvu s ograničenom odgovornošću;
- g) „**privatni interes**“⁴⁴ je bilo kakva ostvarena ili moguća korist, pogodnost ili stavljanje u izgled koristi i pogodnosti za nosioca javne funkcije ili povezano lice;
- h) „**poklon**“⁴⁴ je novac, stvar, pravo i usluga izvršena bez odgovarajuće naknade i svaka druga korist koja je data nosiocu funkcije ili povezanom licu u vezi s vršenjem javne funkcije;
- i) „**privatno preduzeće**“⁴⁴ je svako zakonom utvrđeno privredno društvo koje nije javno preduzeće definirano u daljem tekstu;
- j) „**javna funkcija**“⁴⁴ je posao izabranog ili imenovanog lica u instituciji Bosne i Hercegovine, organu, agenciji i ustanovi koje osniva Bosna i Hercegovina, korporaciji, ili drugom pravnom licu koje vrši javna ovlaštenja, odnosno djelatnosti od javnog interesa, kao i lica na čiji izbor ili imenovanje saglasnost daje ministarstvo u Vijeću ministara BiH, Vijeće ministara BiH, Predsjedništvo BiH i Parlamentarna skupština BiH;
- k) „**vlada**“⁴⁴ je Vijeće ministara BiH, Vlada Federacije BiH, Vlada Republike Srpske, Vlada Brčko Distrikta BiH, vlada kantona, gradska skupština, općinsko vijeće, gradonačelnik i načelnik općine koji su ovlašteni da raspolažu novčanim sredstvima, imovinom i pravima;
- l) „**lična usluga**“⁴⁴ je svako djelovanje kojim se jedna strana obavezuje da obavi određeni posao, a da druga strana za obavljanje tog posla pruži materijalnu ili nematerijalnu korist ili naknadu, koja ne proizlazi iz radnog odnosa;
- m) „**institucija Bosne i Hercegovine**“⁴⁴ je svaka institucija Bosne i Hercegovine osnovana Ustavom i zakonom Bosne i Hercegovine;
- n) „**javno preduzeće**“⁴⁴ je preduzeće osnovano u skladu sa Zakonom o javnim preduzećima Republike Srpske, Zakonom o javnim preduzećima u Federaciji Bosne i Hercegovine i Zakonom o javnim preduzećima Brčko Distrikta BiH;
- o) „**javna ustanova**“⁴⁴ je javna ustanova koju je osnovao entitet, kanton, Brčko Distrikt BiH, grad ili opština.

Član 4.

(Principi djelovanja nosioca javne funkcije)

- (1) Nosilac javne funkcije u obavljanju javne funkcije postupa zakonito, efikasno, nepristrasno i časno i pridržava se principa odgovornosti, poštenja, savjesnosti, otvorenosti i vjerodostojnosti.
- (2) Nosilac javne funkcije lično je odgovoran za svoje djelovanje u obavljanju javne funkcije na koje je imenovan, odnosno izabran, i politički je odgovoran tijelu ili građanima koji su ga imenovali ili izabrali.
- (3) Nosilac javne funkcije ponaša se savjesno i odgovorno, ne ugrožava povjerenje i pouzdanje građana, poštuje zakonske i druge propise kojima se određuju prava, obaveze i odgovornosti u obavljanju javne funkcije.
- (4) U obavljanju javne funkcije nosilac javne funkcije pridržava se etike poziva i funkcije koju obavlja.
- (5) U obavljanju javne funkcije nosilac javne funkcije ne smije svoj privatni interes i interes povezanih lica stavljati iznad javnog interesa.
- (6) Nosilac javne funkcije ne smiju koristiti javnu funkciju za ličnu dobit i dobit lica koje je s njim povezano.
- (7) Nosilac javne funkcije, kao javna ličnost, djeluje u interesu građana.
- (8) U obavljanju funkcije, nosilac javne funkcije obavezan je imovinu, sredstva za rad i finansijska sredstva koja su mu povjerena koristiti na efikasan način i isključivo u svrhu za koju su namjenjena.
- (9) Nosilac javne funkcije, za vrijeme obavljanja javne funkcije, prima plaću i naknade za funkciju koju obavljaju u skladu sa zakonskim propisima o plaćama i naknadama zaposlenih u institucijama Bosne i Hercegovine i drugim propisima.
- (10) U slučaju dileme je li neko ponašanje u skladu s principima Zakona, nosilac javne funkcije može zatražiti mišljenje Komisije.

POGLAVLJE II. Nespojivosti

Član 5.

(Obavljanje drugih funkcija i nespojivosti)

- (1) Nosilac javne funkcije obavlja samo jednu javnu funkciju, osim ako je zakonom i drugim propisom drugačije propisano.
- (2) Odredba iz stava (1) ovog člana odnosi se na zabranu obavljanja druge javne funkcije na svim nivoima vlasti u Bosni i Hercegovini. Javna funkcija, osim funkcije definirane Zakonom, definirana je i zakonima kojima se regulira ista materija na drugim nivoima vlasti.
- (3) Za vrijeme obavljanja javne funkcije, koja podrazumijeva rad s punim radnim vremenom, nosilac javne funkcije ne može obavljati druge poslove.
- (4) Izuzetno od odredbi stava (3) ovog člana, nosilac javne funkcije može se baviti naučnim, nastavnim, kulturnim, umjetničkim i sportskim radom i sticati prihode od autorskih, patentnih i sličnih prava, intelektualnog i industrijskog vlasništva, ako bavljenje ovim djelatnostima ne dovodi do sukoba interesa.
- (5) Članstvo u upravnom odboru, nadzornom odboru, skupštini, upravi ili menadžmentu, ili u

svojstvu ovlaštenog lica u javnom preduzeću ili javnoj ustanovi nespojivo je s obavljanjem javne funkcije.

(6) Članstvo u stalnim ili povremenim radnim tijelima koje formira organ vlasti u kojem nosilac funkcije obavlja funkciju ne smatra se vršenjem dvije ili više javnih funkcija.

(7) Angažman u privatnom preduzeću, u uslovima u kojima se stvara sukob interesa, nespojiv je s obavljanjem javne funkcije.

(8) Nosilac javne funkcije podnosi ostavku na svaku nespojivu i nedozvoljenu funkciju i posao najkasnije u roku od 15 dana nakon preuzimanja javne funkcije.

(9) Ako Komisija utvrdi da nosilac javne funkcije obavlja druge funkcije i aktivnosti suprotno odredbama ovog člana, naložit će nosiocu javne funkcije da prestane sa obavljanjem drugih funkcija i aktivnosti u roku od 30 dana.

Član 6.

(Nespojivosti u odnosu na privatna preduzeća)

(1) Nosilac javne funkcije, za vrijeme obavljanja javne funkcije, ne može biti član skupštine, nadzornog odbora, uprave ili menadžmenta, biti u svojstvu ovlaštenog lica niti imati bilo kakav finansijski interes, što uključuje i pružanje ličnih usluga, u bilo kojem privatnom preduzeću kojem je vlada davala bilo kakve podsticaje i olakšice, uključujući i kreditna sredstva, u iznosu većem od 10.000 KM na godišnjem nivou.

(2) Nosilac javne funkcije ne može biti član skupštine, nadzornog odbora, uprave ili menadžmenta, biti u svojstvu ovlaštenog lica ili imati finansijski interes, što uključuje i pružanje ličnih usluga, u bilo kojem privatnom preduzeću koje sklapa ugovore ili na drugi način posluje s institucijama i organima koji se finansiraju iz budžeta na bilo kojem nivou. Ova odredba primjenjuje se na privatna preduzeća koja su sklopila ugovor ili posluju s institucijama koje se finansiraju iz budžeta u iznosu većem od 10.000 KM na godišnjem nivou.

Član 7.

(Zabrana djelovanja u slučaju sukoba interesa)

(1) Nosilac javne funkcije ne može učestvovati u procesu odlučivanja niti glasati po bilo kojem pitanju koje se direktno tiče privatnog preduzeća u kojem taj nosilac javne funkcije ili povezano lice ima finansijski interes, te bilo kojem drugom pitanju koje se direktno tiče povezanog lica. Nosilac javne funkcije koji se nađe u takvoj situaciji izuzet će se iz procesa odlučivanja i od glasanja, te na otvorenoj sjednici objasniti razloge izuzeća.

(2) Nosilac javne funkcije neće poduzimati nikakve službene radnje koje bi mogle direktno uticati na privatno preduzeće u kojem nosilac javne funkcije ili povezano lice ima finansijski interes, kao ni radnje kojima nosilac funkcije i povezano lice direktno ostvaruju finansijski interes, što uključuje i zaposlenje, imenovanje ili postavljenje povezanog lica. Nosilac javne funkcije će u takvim situacijama prosljediti donošenje odluke o poduzimanju radnje drugom nadležnom organu i pismeno navesti razloge za takvo prosljeđivanje.

Član 8.

(Korištenje funkcije i jasnih resursa za promociju političkog subjekta)

Nosilac javne funkcije ne može koristiti javne resurse kojima ima pristup u svojstvu onog koji obavlja funkciju, za promociju političkih stranaka, odnosno političkih subjekata i u lične svrhe.

Član 9.

(Obavljanje drugih poslova nosilaca javnih funkcija)

(1) Za vrijeme obavljanja javne funkcije nosilac javne funkcije ne smije obavljati dužnost predsjednika, direktora ili člana organa upravljanja i nadzornog organa u fondaciji i udruženju osnovanom u skladu sa zakonima o udruženjima i fondacijama, a koji se finansiraju iz budžeta bilo kojeg nivoa vlasti, u iznosu od 10.000 KM godišnje, odnosno u iznosu većem od 50.000 KM godišnje u fondaciji i udruženju iz oblasti kulture i sporta.

(2) Nosilac javne funkcije koji je član, predsjednik, direktor, ili član organa upravljanja i nadzornog organa udruženja ili fondacije ne može primati naknadu ili poklone po osnovu članstva u udruženju, izuzev naknade za putne i druge troškove.

Član 10.

(Angažman bliskih srodnika)

Do sukoba interesa nosioca javne funkcije dovodi i angažman bliskog srodnika u situacijama definiranim članom 5. stav (5) ovog Zakona, isključujući angažman u javnim ustanovama, te čl. 6. i 9. ovog Zakona.

Član 11.

(Ograničenja nakon prestanka funkcije)

- (1) U periodu od 12 mjeseci po prestanku javne funkcije nosilac javne funkcije ne može:
- a) pred organom u kojem je obavljao javnu funkciju nastupati kao predstavnik ili punomoćnik pravnog lica, preduzetnika ili međunarodne ili druge organizacije koja s tim javnim organom ima ili uspostavlja ugovorni, odnosno poslovni odnos;
 - b) zasnovati radni odnos ili uspostaviti poslovnu saradnju s pravnim licem, preduzetnikom ili međunarodnom ili drugom organizacijom koji ostvaruju korist na osnovu odluka organa u kojem je nosilac javne funkcije obavljao funkciju;
 - c) zastupati pravno ili fizičko lice pred organom u kojem je vršio javnu funkciju u predmetu u kojem je kao javni funkcioner učestvovao u donošenju odluke;
 - d) obavljati poslove upravljanja ili revizije u pravnom licu u kojem su, najmanje jednu godinu prije prestanka javne funkcije, njegove dužnosti bile povezane sa supervizorskim ili kontrolnim poslovima;
 - e) stupiti u ugovorni odnos ili drugi oblik poslovne saradnje sa organom u kojem je obavljao funkciju;
 - f) upotrijebiti povlaštene informacije i obavještenja do kojih je došao u obavljanju javne funkcije radi sricanja koristi za sebe ili drugog ili radi nanošenja štete drugom, osim ako su ta znanja i obavještenja dostupna javnosti.

Član 12.

(Zabranjene aktivnosti)

Osim ako je to izričito dozvoljeno odredbama ovoga Zakona, nosiocu javne funkcije zabranjeno je:

- a) primiti ili zahtijevati poklon ili drugu korist ili obećanje poklona ili druge koristi radi obavljanja javne funkcije;
- b) primiti dodatnu naknadu za obavljanje poslova u sklopu obavljanja javne funkcije;
- c) tražiti, prihvatiti ili primiti poklon ili uslugu radi glasanja o bilo kojem pitanju ili uticati na odluku nekog tijela ili osobe;
- d) obećavati zaposlenje ili neko drugo pravo u zamjenu za poklon ili obećanje poklona;
- e) privilegovati osobe radi stranačkog ili drugog opredjeljenja ili radi porijekla, ličnih ili porodičnih veza;
- f) odbiti uvid u svoje finansijsko poslovanje;
- g) uticati na dobivanje poslova ili narudžbi države u cilju sricanja materijalne ili nematerijalne koristi za sebe ili za drugog;
- h) koristiti povlaštene informacije o radu državnih organa radi lične koristi ili koristi interesno povezanih lica i
- i) koristiti svoj položaj kako bi uticao na zakonodavne, izvršne ili sudske vlasti te tako postigao ličnu korist ili korist interesno povezanog lica, neku povlasticu ili pravo, sklopio pravni posao ili na drugi način interesno pogodio sebi ili drugom interesno povezanom licu.

Član 13.

(Primanje poklona)

- (1) Poklon se definira u skladu s članom 3. tačka h) Zakona. Vrijednost poklona je njegova tržišna vrijednost.
- (2) Poklon u vrijednosti do 200 KM nosioci javne funkcije mogu zadržati i ne trebaju ga prijaviti.
- (3) Poklonom, u smislu stava (2) ovoga člana, smatra se i više poklona učinjenih od istog lica u toku jedne godine. Ukoliko nosilac javne funkcije dobije više poklona od istog lica u toku jedne godine, njihova ukupna vrijednost ne smije preći iznos od 200 KM.
- (4) Poklone u vrijednosti većoj od 200 KM nosilac javne funkcije ne smije zadržati i obavezan ih je prijaviti i predati instituciji vlasti koja gaje izabrala ili imenovala i u čije ime obavlja povjerenu javnu funkciju. Informaciju o predatora poklonu institucije BiH dužne su dostaviti Komisiji u roku od 15 dana od dana prijema poklona.
- (5) Nosilac javne funkcije ne smije primiti novac, ček ili drugi vrijednosni papir bez obzira na iznos.
- (6) U slučaju sumnje o vrijednosti poklona, nosilac javne funkcije dužan je obratiti se upitom Komisiji.
- (7) Primanje poklona, u skladu s odredbama ovog Zakona, odnosi se i na lice koje prima poklon u korist nosioca javne funkcije.
- (8) Komisija će u roku od 30 dana od dana stupanja na snagu ovog Zakona posebnim aktom propisati postupak, način evidentiranja, predaje i čuvanja primljenih poklona u institucijama Bosne

i Hercegovine.

(9) Komisija je dužna uspostaviti centralni registar poklona koje je nosilac javne funkcije primio u toku obavljanja javne funkcije.

POGLAVLJE III. Izvještaji o finansijskom stanju i imovini

Član 14.

(Podnošenje izvještaja o finansijskom stanju i imovini nosilaca javne funkcije)

- (1) Nosilac javne funkcije dužan je, u roku od 30 dana od dana stupanja na javnu funkciju podnijeti Komisiji Izvještaj o finansijskom stanju i imovini (u daljnjem tekstu: Izvještaj), za sebe i bliske srodnike prema stanju na dan izbora, odnosno imenovanja.
- (2) Izvještaj sadrži lične podatke nosioca funkcije i njegovih bliskih srodnika, uključujući JMB, podatke o funkciji koju nosilac javne funkcije obavlja, te podatke o:
 - a) pravu vlasništva na nepokretnim stvarima u zemlji i inozemstvu;
 - b) pravu vlasništva na pokretnim stvarima koje podliježu registraciji kod nadležnih organa u zemlji i inozemstvu;
 - c) pravu vlasništva na drugim pokretnim stvarima vrijednosti veće od 2.000 KM (dragocjenosti, zbirke, umjetnički predmeti i si.);
 - d) depozitima u bankama i drugim finansijskim organizacijama, u zemlji i inozemstvu;
 - e) akcijama i udjelima u pravnom licu i drugim vrijednosnim papirima;
 - f) pravima po osnovu autorskih, patentnih i sličnih prava intelektualnog vlasništva;
 - g) dugovima (glavnica, kamata i rok otplate) i potraživanjima;
 - h) izvoru i visini neto prihoda od obavljanja javne funkcije;
 - i) pravu korištenja stana za službene potrebe;
 - j) izvoru i visini drugih neto prihoda;
 - k) drugim poslovima i djelatnostima koje obavlja u skladu sa zakonom;
 - l) članstvu u organima udruženja;
 - m) druge podatke i dokaze koje funkcioner smatra bitnim za primjenu ovog zakona.
- (3) Nosilac funkcije dužan je u Izvještaju navesti tačne i potpune podatke.
- (4) Nosilac javne funkcije za vrijeme obavljanja funkcije podnosi:
 - a) ažuriran Izvještaj jednom godišnje, do 31. marta tekuće godine za prethodnu godinu-,
 - b) dopunu Izvještaja za svaku promjenu iz stava (2) tač. a), b), c), f), i), k), l) i m) ovog Člana, kao i u slučaju promjena Izvještaju koje se odnose na uvećanje imovine po bilo kom osnovu u iznosu većem od 10.000 KM, u roku od 30 dana od dana nastanka promjene;
 - c) ažuriran Izvještaj na zahtjev Komisije, u slučaju pokretanja postupka za utvrđivanje povrede odredbi ovog Zakona, u roku od 30 dana od dana prijema zahtjeva.
- (5) Nosioци javnih funkcija dužni su podnositi Izvještaj jednu godinu nakon prestanka obavljanja funkcije.
- (6) U roku od 30 dana od dana prestanka funkcije, nosilac javne funkcije o tome obavještava

Komisiju i podnosi Izvještaj.

(7) Komisija će, u roku od 60 dana od dana stupanja na snagu ovog Zakona, propisati obrasce i pobliže sadržaje Izvještaja, te uspostaviti Jedinstveni registar imovine nosilaca javnih funkcija.

(8) Komisija je dužna evidentirati Izvještaje u Jedinstveni registar imovine nosilaca javnih funkcija.

(9) Jedinstveni registar imovine nosilaca javnih funkcija dostupan je na službenoj web- stranici Komisije. Lični podaci nosilaca javnih funkcija i njihovih bliskih srodnika štite se u skladu sa zakonskim propisima, s ciljem sprečavanja zloupotreba.

Član 15.

(Provjera podataka iz Izvještaja)

(1) Komisija vrši provjeru tačnosti i potpunosti podataka iz Izvještaja upoređivanjem tih podataka sa prikupljenim podacima o imovini i prihodima nosioca javne funkcije od organa i pravnih lica koji raspolažu tim podacima, na svim nivoima vlasti u Bosni i Hercegovini. Postupak prikupljanja podataka i njihove provjere, kao i organe od kojih se pribavljaju podaci, Komisija detaljno propisuje Pravilnikom o prikupljanju i postupku provjere podataka iz izvještaja o finansijskom stanju u imovini nosilaca javnih funkcija.

(2) Organi i pravna lica iz stava (1) ovog člana dužni su da, u roku i na način koji odredi Komisija, dostave tražene podatke, odnosno stave na uvid traženu dokumentaciju u skladu sa Zakonom.

(3) Ako se u postupku provjere utvrdi da ne postoji saglasnost između podataka navedenih u Izvještaju i stvarnog stanja ili da ne postoji saglasnost između uvećane vrijednosti imovine nosioca javne funkcije i njegovih prijavljenih prihoda, nosilac funkcije dužan je da se, na zahtjev Komisije, očituje u pisanoj formi u roku od 30 dana, te dostavi detaljne podatke o osnovima sticanja imovine i prihoda.

(4) Ako nosilac javne funkcije:

a) ne dostavi Komisiji očitovanje u pisanoj formi u propisanom roku od 30 dana ili

b) ne priloži odgovarajuće dokaze potrebne za usklađivanje podataka navedenih u Izvještaju sa podacima koji su utvrđeni postupkom provjere,

Komisija će pokrenuti postupak protiv nosioca funkcije, zbog kršenja odredbi iz člana 14. ovog Zakona, te će o tome obavijestiti organ u kome nosilac funkcije vrši javnu funkciju i druge nadležne organe.

(5) Postupak provjere podataka iz Izvještaja nije dostupan za javnost do donošenja konačne odluke Komisije.

Član 16.

(Provođenje Zakona i osnivanje Komisije za odlučivanje o sukobu interesa)

(1) Za provođenje ovog Zakona osniva se Komisija.

(2) Komisija je stalno, nezavisno i samostalno tijelo koje je uspostavila Parlamentarna skupština BiH, sa sjedištem u Agenciji za prevenciju korupcije i koordinaciju borbe protiv korupcije (u daljnjem tekstu: Agencija), a koje obavlja poslove iz svog djelokruga i nadležnosti određene ovim

zakonom.

- (3) Za člana Komisije ne može biti imenovano lice koje je nosilac javne funkcije.
- (4) Zabranjen je svaki oblik uticaja na rad Komisije koji bi mogao ugroziti njenu samostalnost i nezavisnost u donošenju odluka.
- (5) Sredstva za rad Komisije osiguravaju se u Budžetu Parlamentarne skupštine BiH.

Član 17.

(Nadležnosti Komisije)

- (1) Komisija djeluje na osnovu Zakona kako bi osigurala političku odgovornost i vjerodostojnost nosilaca javne funkcije u cilju zaštite integriteta funkcije.
- (2) Komisija nepristrasno, odgovorno i objektivno provodi postupak za utvrđivanje postojanja sukoba interesa u konkretnom djelovanju ili situaciji i izriče sankcije, u skladu sa odredbama ovog Zakona.
- (3) Komisija usvaja Poslovnik.
- (4) Komisija uspostavlja, ažurira i provjerava Registar nosilaca javnih funkcija i njihove imovine (u daljnjem tekstu: Registar), donosi upute, propise i obrasce za podnošenje Izvještaja.
- (5) Komisija donosi Pravilnik o načinu vođenja Registra, kojim se propisuju pravila o vođenju registra, obrasci, kao i druga pitanja neophodna za funkcioniranje Registra.
- (6) Komisija donosi Pravilnik o načinu vođenja postupka, dostavljanju odluke te sastavljanju izvještaja.
- (7) Komisija donosi odluke o tome da li neko djelovanje ili situacija predstavljaju kršenje odredbi ovog zakona i izriče sankcije, u skladu sa odredbama ovog zakona.
- (8) S ciljem primjene odredbi ovog zakona, Komisija daje mišljenja i donosi uputstva na upit ili po službenoj dužnosti. Rok za dostavljanje mišljenja ili uputstva na upit nosioca javnih funkcija ili drugih zainteresovanih lica je 15 dana.
- (9) Komisija provodi obuke, prezentacije i informiše nosioce javnih funkcija o njihovim pravima i obavezama značajnim za sukob interesa i podnošenje izvještaja o finansijskom stanju i imovini, te na druge načine promoviše vrijednosti i principe ovog zakona.

Član 18.

(Postupak izbora članova Komisije)

- (1) Komisiju čine predsjednik i četiri člana.
- (2) Predsjednik i članovi Komisije se biraju na mandat od pet godina, na način i po postupku utvrđenim ovim zakonom.
- (3) Predsjednik i članovi Komisije mogu biti izabrani najviše dva puta.
- (4) Predsjednik i članovi Komisije biraju se na osnovu javnog poziva.
- (5) Postupak oglašavanja i utvrđivanja prijedloga kandidata provodi Zajednička komisija za ljudska prava Parlamentarne skupštine Bosne i Hercegovine.
- (6) Odluka o listi uspješnih kandidata donosi se dvotrećinskom većinom glasova.

(7) Šest mjeseci prije isteka mandata predsjednika, odnosno Članova Komisije, pokreće se postupak za izbor novog predsjednika, odnosno članova Komisije.

Član 19.

(Izbor predsjednika i članova Komisije)

- (1) Predsjednika i članove Komisije bira Parlamentarna skupština Bosne i Hercegovine na osnovu liste kandidata koju sastavlja Zajednička komisija za ljudska prava Parlamentarne skupštine BiH.
- (2) Mandat predsjednika i članova Komisije počinje danom imenovanja.
- (3) Predsjednik i članovi Komisije koji se biraju putem javnog poziva imaju pravo na naknadu za rad u Komisiji u visini koju oređi Zajednička komisija za administrativne poslove Parlamentarne skupštine BiH.

Član 20.

(Uslovi za izbor predsjednika i članova Komisije)

- (1) Kandidat za predsjednika, odnosno člana Komisije, mora ispunjavati sljedeće uslove:
 - a) daje državljanin Bosne i Hercegovine;
 - b) da ima prebivalište na području Bosne i Hercegovine;
 - c) da ima završen pravni fakultet (240 ECST bodova) ako se kandidira za predsjednika, odnosno visoku stručnu spremu (240 ECST bodova) ako se kandidira za člana Komisije;
 - d) da ima najmanje osam godina radnog iskustva u struci ako se kandidira za predsjednika, odnosno četiri godine ako se kandidira za člana Komisije;
 - e) da nije osuđivan za krivična djela i da se protiv njega ne vodi krivični postupak;
 - f) da nije član političke stranke i da nije bio član političke stranke pet godina prije kandidature za predsjednika ili člana Komisije;
 - g) da pet godina prije kandidiranja za predsjednika ili člana Komisije nije obavljao funkciju poslanika, delegata, odbornika ili vijećnika, gradonačelnika, načelnika općine, člana vlade ili savjetnika na bilo kojem nivou vlasti u Bosni i Hercegovini;
- (2) Nakon izbora za predsjednika, odnosno za člana Komisije, kandidat je dužan da podnese, redovno ažurira i javno objavi Izvještaj o finansijskom stanju i imovini iz Člana 14. ovog zakona.

Član 21.

(Ovlaštenja predsjednika Komisije)

- (1) Predsjednik Komisije organizira i upravlja radom Komisije.
- (2) Članovi Komisije između sebe biraju dva potpredsjednika koji zamjenjuju predsjednika u slučaju spriječenosti i po njegovom ovlaštenju.
- (3) Predsjednik Komisije zadužit će pojedinog člana Komisije za određeno područje rada iz nadležnosti Komisije.
- (4) Predsjednik saziva i predsjedava sjednicama Komisije, potpisuje akte donesene na sjednicama

Komisije, brine o pravilnom i efikasnom provođenju Zakona, te obavlja druge poslove utvrđene Zakonom i Poslovníkom Komisije.

Član 22.

(Prestanak dužnosti članova Komisije)

- (1) Članovima Komisije dužnost prestaje prije isteka mandata u slučaju smrti i u slučajevima razrješenja s dužnosti.
- (2) Članovi Komisije bit će razriješeni s dužnosti:
 - a) na vlastiti zahtjev;
 - b) u slučaju gubitka poslovne sposobnosti;
 - c) ako prestanu postojati uslovi za izbor iz člana 20. ovog zakona;
 - d) ako prekrše odredbe ovog zakona.
- (3) Odluku o razrješenju s dužnosti članova Komisije donosi Parlamentarna skupština BiH.
- (4) Ako član Komisije, na vlastiti zahtjev, zatraži da bude razriješen dužnosti a Parlamentarna skupština BiH ne donese odluku o zahtjevu u roku od tri mjeseca od dana podnošenja zahtjeva, članu Komisije funkcija prestaje po sili zakona istekom tri mjeseca od dana podnošenja zahtjeva.
- (5) U slučaju prestanka funkcije predsjedniku Komisije, članovi Komisije između sebe biraju vršioca dužnosti predsjednika, koji tu dužnost obavlja do izbora novog predsjednika.
- (6) U roku od 30 dana od dana prestanka dužnosti članu Komisije, Zajednička komisija za ljudska prava Parlamentarne skupštine BiH pokreće postupak izbora novog člana Komisije.

Član 23.

(Ured Komisije)

- (1) Stručna služba Komisije je Ured Komisije za odlučivanje o sukobu interesa (u daljnjem tekstu: Ured Komisije) koji obavlja stručne, administrativne i tehničke poslove, a djeluje pri Agenciji.
- (2) Komisija dostavlja Vijeću ministara BiH na suglasnost Pravilnik o unutrašnjoj organizaciji i sistematizaciji radnih mjesta (u daljnjem tekstu: Pravilnik), kojim se uređuje unutrašnja organizacija Ureda Komisije, utvrđuju se radna mjesta i opis poslova, broj državnih službenika i zaposlenika, stručni i drugi uslovi potrebni za raspored na radna mjesta. Na zaposlene u Uredu Komisije primjenjuju se propisi koji se odnose na državne službenike i zaposlenike.

Član 24.

(Postupak pred Komisijom)

- (1) Komisija može pokrenuti postupak za utvrđivanje kršenja odredbi Zakona i izreći sankcije:
 - a) po službenoj dužnosti;
 - b) na zahtjev nosioca javne funkcije;
 - c) na zahtjev neposredno pretpostavljenog nosiocu javne funkcije;
 - d) na zahtjev organa u kojem obavlja funkciju;
 - e) na osnovu prijave o sukobu interesa.
- (2) Podaci o podnosiocu prijave iz stava (1) tačka e) ovog člana su povjerljivi, osim ako podnosilac prijave izričito zatraži da ti podaci budu dostupni javnosti, odnosno nosiocu funkcije na kojeg se prijava odnosi, kao i organu u kojem obavlja funkciju.
- (3) Komisija je dužna obavijestiti podnosioca prijave o svojoj odluci.
- (4) Ako lice sumnja u moguće kršenje Zakona, može tražiti od Komisije da mu u roku od 15 dana izda savjetodavno mišljenje koje se neće objavljivati. Savjetodavno mišljenje uključuje i preporuke za poduzimanje mjera za uklanjanje sukoba interesa, ako on postoji. U slučaju da se utvrdi kršenje Zakona, nosiocu javne funkcije će se odrediti rok za poduzimanje mjera i otklanjanje uzroka kršenja Zakona, ili ako ih nije moguće otkloniti, Komisija će pokrenuti postupak u skladu sa stavom (1) tačka a) ovog člana.
- (5) Komisija je dužna provesti postupak u roku od šest mjeseci, dok je rok za pokretanje postupka u odnosu na počinjenje povrede odredbi ovog Zakona četiri godine.
- (6) Komisija obavještava nosioca javne funkcije o pokretanju postupka iz stava (1) ovog člana.
■
- (7) Komisija može pozvati nosioca javne funkcije, povezano lice, kao i lice na osnovu čije prijave je pokrenut postupak radi pribavljanja informacija i zatražiti dostavljanje potrebnih podataka, u cilju odlučivanja o postojanju povrede Zakona.
- (8) Komisija će od nosioca javne funkcije protiv koga je pokrenut postupak iz stava (1) ovog člana zatražiti da dostavi pisano izjašnjenje u roku od 15 dana od dana prijema zahtjeva za dostavljanje pisanog izjašnjenja.
- (9) Ako nosilac javne funkcije ne dostavi pisano izjašnjenje, Komisija će nastaviti postupak u skladu sa ovim Zakonom.
- (10) Komisija ima pravo da utvrdi činjenice vlastitom administrativnom istragom ili da pribavi

činjenice i dokaze u saradnji s drugim organima. Svi javni organi na svim nivoima vlasti u Bosni i Hercegovini, te sva lica od kojih Komisija to zatraži, obavezni su Komisiji dostaviti tražene informacije.

(11) Ukoliko javni organi te lica iz stava (10) ovog člana ne postupe po zahtjevima Komisije iz člana 15. stav (2), te člana 24. stav (7) i (10) Zakona, Komisija obavještava organ koji vrši nadzor nad njihovim radom, te može podnijeti poseban izvještaj Parlamentarnoj skupštini BiH i njenim nadležnim komisijama, odnosno obavijestiti javnost.

(12) Osim kada je Zakonom drugačije propisano, postupak pred Komisijom otvoren je za javnost.

(13) Komisija je dužna konačnu odluku donijeti najkasnije u roku od 15 dana od dana okončanja postupka prikupljanja činjenica i izvođenja dokaza.

(14) U slučaju postojanja sumnje da je učinjeno krivično djelo, Komisija će izvještaj sa dokazima prikupljenim u vršenju svoje dužnosti, bez odlaganja dostaviti nadležnom tužilaštvu.

(15) O sukobu interesa članova Komisije za odlučivanje o sukobu interesa odlučuje Zajednička komisija za administrativne poslove Parlamentarne skupštine BiH.

Član 25.

(Donošenje odluka)

(1) Komisija odlučuje na sjednicama većinom glasova svih članova Komisije.

(2) Pravosnažne i konačne odluke moraju biti obrazložene i objavljuju se na web-stranici Komisije.

Član 26.

(Žalba)

Protiv odluke Komisije može se izjaviti žalba Apelacionom odjeljenju Suda Bosne i Hercegovine u roku od 15 dana od dana prijema odluke.

Član 27.

(Sankcije)

(1) Sankcije koje Komisija može izreći nosiocu javne funkcije za povrede ovog Zakona su:

- a) opomena;
- b) novčana kazna u iznosu od 1.000 do 20.000 KM;
- c) prijedlog za razrješenje s dužnosti;
- d) poziv na podnošenje ostavke.

(2) Opomena, iz stava (1) tačka a) ovog člana, izriče se za lakše oblike kršenja odredbi ovog Zakona.

(3) Novčanu kaznu, iz stava (1) tačka b) ovog člana, Komisija izriče za kršenje odredbi čl. 5., 6., 7., 8., 9., 10., 11., 12., 13. i 14. vodeći računa o težini i posljedicama povrede Zakona, te šteti koju je povreda nanijela integritetu funkcije koju nosilac javne funkcije obavlja.

(4) Prijedlog za razrješenje s dužnosti iz stava (1) tačka c) ovog člana izriče se nosiocima javnih funkcija koji nisu izabrani zvaničnici, u situacijama kada je utvrđeno kršenje odredbi čl. 6. i 11. Zakona.

(5) Prijedlog za razrješenje s dužnosti nosioca javne funkcije Komisija podnosi organu vlasti

nadležnom za njegov izbor ili imenovanje. Organ vlasti nadležan za izbor ili imenovanje nosioca javne funkcije dužan je da obavijesti Komisiju o mjerama preduzetim povodom izrečene mjere prijedloga za razrješenje, u roku od 30 dana od dana prijema prijedloga.

(6) U situacijama kada Komisija utvrdi daje izabrani zvaničnik prekršio zakonske odredbe iz stava (3) ovog člana, Komisija će izabranog zvaničnika pozvati da podnese ostavku na obnašanje javne funkcije. Komisija će poziv na ostavku objaviti u "Službenom glasniku BiH", te na web-stranici Komisije.

(7) Novčana kazna u iznosu od 100 KM do 500 KM izriče se nosiocu javne funkcije za kašnjenje u dostavljanju izvještaja o finansijskom stanju i imovini.

(8) Dodatna mjera koju Komisija izriče je zahtjev za poništenje djela nastalog u situaciji sukoba interesa, u slučajevima kada utvrdi da je nosilac javne funkcije pribavio korist, sklopio ugovor, donio odluku ili dao saglasnost na odluke koje ga stavljaju u sukob interesa. Zahtjev se dostavlja organu u kojem ili u ime kojeg je nastalo djelo, kojem se ostavlja rok od 60 dana da donese odluku na osnovu zahtjeva Komisije te istu obrazloži.

(9) Ako je povredom ovog Zakona pravnom ili fizičkom licu pričinjena šteta, to lice ostvaruje pravo na naknadu štete tužbom u parničnom postupku kod nadležnog suda, primjenom opštih pravila o naknadi štete.

(10) Ako ne dostave tražene podatke i obavještenja, odnosno ne stave na uvid traženu dokumentaciju, organima i pravnim licima iz čl. 15. i 24. Zakona Komisija izriče novčanu kaznu u iznosu od 300 do 5.000 KM.

(11) Odgovorna lica u organima i pravnim lica kazniće se za prekršaj iz stava (10) ovog člana novčanom kaznom u iznosu od 200 do 3.000 KM.

Član 28.

(Izvještaj)

Komisija jednom godišnje podnosi izvještaj o svom radu Parlamentarnoj skupštini BiH.

Član 29.

(Prijelazne i završne odredbe)

- (1) U roku 30 dana od dana stupanja na snagu ovog Zakona, Parlamentarna skupština BiH pokrenut će postupak imenovanja članova Komisije, koji će se okončati u roku od 90 dana od dana stupanja na snagu ovog Zakona.
- (2) Do izbora predsjednika i članova Komisije iz stava (1) ovog Člana, Komisija u dosadašnjem sastavu obavljat će poslove u skladu sa ovim Zakonom.
- (3) U roku od 30 dana od dana stupanja na snagu ovog zakona, Komisija sačinjava akte iz člana 17. ovog zakona i objavljuje ih na web-stranici Komisije.
- (4) Svi podzakonski akti doneseni na osnovu Zakona o sukobu interesa u institucijama vlasti BiH ("Službeni glasnik BiH", br. 13/02, 16/02, 14/03, 12/04, 63/08, 18/12, 87/13 i 41/16) ostaju na snazi do donošenja novih.
- (5) Postupci pokrenuti do dana stupanja na snagu ovog Zakona bit će okončani po propisima koji su bili na snazi u vrijeme pokretanja postupka, ako je to povoljnije za stranku u postupku.

Član 30.

(Prestanak važenja)

Danom stupanja na snagu ovog Zakona predstaje da važi Zakon o sukobu interesa u institucijama vlasti BiH ("Službeni glasnik BiH", br. 13/02, 16/02, 14/03, 12/04, 63/08, 18/12, 87/13 i 41/16).

Član 31.

(Stupanje na snagu)

Ovaj Zakon stupa na snagu osmog dana od dana objave u "Službenom glasniku BiH".

O B R A Z L O Ž E N I E

I. Ustavni osnov za usvajanje zakona

Ustavni osnov za usvajanje ovog Zakona sadržan je u članu IV.4 a. Ustava BiH, po kojem je Parlamentarna skupština BiH nadležna za donošenje zakona koji su potrebni za provođenje odluka Predsjedništva BiH ili za vršenje funkcija Skupštine po Ustavu.

II. Razlozi za donošenje zakona

Postojeći Zakon o sukobu interesa u institucijama vlasti Bosne i Hercegovine (Službeni glasnik BiH, br. 16/02, 14/03, 12/04, 63/08, 18/12, 87/13, 41/16) neophodno je mijenjati kako bi se osigurala efikasna i nezavisna primjena instituta sukoba interesa, te ujednačili i uskladili propisi koji regulišu sukob interesa i izvještaje o imovinskom finansijskom stanju nosilaca javnih funkcija.

Obaveza izmjena ovog Zakona proizilazi iz Strategije za borbu protiv korupcije (2015-2019) i Akcionog plana, a koja je predviđena u Strateškom programu 1.12 (*Uskladjivanje zakonodavnog okvira u BiH sa obavezama iz ratificiranih međunarodnih konvencija*).

Šta više, usvajanje ovog Zakona predstavlja jedan od četrnaest prioriteta Evropske komisije, vezano, za aplikaciju Bosne i Hercegovine za članstvo u Evropskoj uniji, te jedan od samo tri zakonska rješenja navedena među tih četrnaest prioriteta.

Evidentna je potreba usuglašavanja Zakona sa prihvaćenim međunarodnim standardima i preporukama, kao i ratifikovanim međunarodno-pravnim instrumentima koji regulišu oblast sukoba interesa imajući u vidu obaveze BiH na evropskom putu u oblasti vladavine prava i borbe protiv korupcije. Ovo je naglašeno i u četvrtom evaluacijskom izvještaju Grupe zemalja Vijeća Evrope protiv korupcije, te u izvještaju Evropske komisije za BiH za 2016. godinu u kojem je konstatovano da su normativni i institucionalni okvir za sukob interesa neadekvatni i da su izmjene zakona neophodne. To se prvenstveno odnosi na sastav, pravni status i nadležnosti tijela za sprovođenje zakona o sukobu interesa, a koji u važećem Zakonu o sukobu interesa nisu usaglašeni sa gore pomenutim standardima što za posljedicu ima nedjelotvornost sistema sprječavanja i sankcionisanja sukoba interesa. Takođe, noveliranje pravnog okvira o sukobu interesa u institucijama vlasti BiH navedeno je i kao jedan od prioriteta u Akcionom planu Reformske agende.

S tim u vezi, Prijedlog Zakona o sukobu interesa u institucijama Bosne i Hercegovine, podrazumjeva sljedeće izmjene u odnosu na postojeći Zakon:

Uspostavljanje nezavisnog, profesionalnog tijela za provođenje Zakona, odnosno Komisije za odlučivanje o sukobu interesa, kao stalno, nezavisno i samostalno tijelo uspostavljeno od Parlamentarne skupštine BiH, čije Članove bira Parlamentarna skupština BiH, ali koji se biraju na osnovu javnog poziva;

Detaljnije defmisanje i proširenje kruga lica na koja se Zakon primjenjuje, s ciljem ujednačenog tretmana prema svim nosiocima javnih funkcija;

Uvođenje jasnih i jedinstvenih pravila koja ograničavaju vršenje više funkcija, te jasnih pravila u obavljanju funkcija, angažmana i poslovanja nosilaca javnih funkcija i nakon prestanka funkcije, kako bi se osigurala nepristrasnost u donošenj odluka;

Objedinjavanje i usklađivanje propisa o izvještajima o imovini i sukoba interesa, jasno defmisanje nadležnosti u pogledu prikupljanja, objavljivanja i kontrole od strane Komisije koja provodi zakon;

Uvođenje dostupnosti i obaveze podnošenja imovinskih kartona na godišnjoj osnovi, kao i uspostavljanje sistema provjere tačnosti podataka u izvještajima i objavljivanje registra nosilaca funkcija i njihove imovine;

Proširenje spektra i vrsta sankcija i uvođenje novih mehanizama, kao što su poništenje djela nastalog u situaciji sukoba interesa.

III. Principi na kojima je prijedlog zakona zasnovan

Prilikom izrade ovog akta, predlagač se vodio sljedećim principima:

Princip nediskriminacije, gdje se predloženim odredbama osiguravaju jednaka prava i obaveze svim nosiocima javnih funkcija na koje se Zakon odnosi, te nepristrasan i objektivan pristup provođenju Zakona;

Princip pravne sigurnosti, kao posebno važan segment za osiguranje vladavine prava, imajući u vidu da su u procesu provođenja postojećeg Zakona o sukobu interesa u institucijama vlasti BiH identifikovane prepreke za njegovo efikasno provođenje, uzrokovane neadekvatnim pravnim i administrativnim statusom Komisije za odlučivnje o sukobu interesa. S tim u vezi Prijedlog Zakona o sukobu interesa u institucijama BiH usmjerenje na jasno defmisanje statusa tijela za primjenu Zakona, te osiguranje njegove nezavisnosti i efikasnosti. Ovaj princip korišten je i kroz osiguranje kontinuiteta i nesmetane primjene zakona i u periodu uspostavljanja nove Komisije i usvajanja podzakonskih akata.

IV. Usklađenost sa evropskim zakonodavstvom i međunarodnim dokumentima

Predlagač se pri izradi Prijedloga rukovodio OECD Smjernicama za rješavanje sukoba interesa u javnoj upravi, preporukama Grupe zemalja za borbu protiv korupcije Vijeća Evrope (GRECO) navedenim u Četvrtom evaluacijskom izvještaju za Bosnu i Hercegovinu, nalazima i preporukama Evropske komisije iz Izvještaja za Bosnu i Hercegovinu iz 2016 god, te prioritetima definisanim u maju 2019. god. od strane Evropske komisije vezano za aplikaciju Bosne i Hercegovine za članstvo u Evropskoj uniji.

V. Finansijska sredstva za provedbu zakona

Za provedbu Zakona neophodno je osigurati finansijska sredstva potrebna za rad članova Komisije za odlučivanje o sukobu interesa.

VI. Druge okolnosti i razlozi za hitni postupak

S obzirom da Evropska komisija od Bosne i Hercegovine kao uslov za otvaranje pregovora zahtjeva usvajanje Zakona o sprečavanju sukoba interesa u institucijama Bosne i Hercegovine i da je ostalo kratko vrijeme do kraja februara 2024.godine da isti bude usvojen, iz toga razloga predlažmo hitni zakonodavni postupak.